

四庫全書

史部

欽定四庫全書

史部
皇清開國方略卷十九至二十一

內閣中書_臣沈鵬覆勘

總校官原任侍講_臣王燕緒

欽定四庫全書

皇朝通志卷十九

太宗文皇帝

天聰八年甲戌
北月 曆十二月

天聰八年秋七月癸酉駐軍宣府城東南

秋七月丙戌科爾沁部長巴達哩布達齊洪果爾

棟果爾武克善多爾濟桑阿爾齋索諾穆滿珠什

哩達爾漢巴圖魯塞拔噶爾瑪固穆占巴拉塞爾

圖校等率兵五千來會

御行幄大宴之

賜蟒袍各一已丑定議分軍四路並入明邊期會朔州

命貝勒阿濟格多爾袞多鐸大臣阿山伊爾登率兩白旗

兵偕翁牛特部遜杜梭察哈爾部新附圖巴濟農

是月壬午師次烏爾圖布拉克遇圖巴濟農率衆來歸即以隨征

及諸宰桑自巴

顏珠爾格地入龍門辛卯

命貝勒豪格額駙揚古利等攻尚方堡毀邊牆分軍捉生

設伏

親統師繼之壬辰豪格等奏邊牆已毀于是大軍入尚

方堡分道而進至宣府右衛

命巴克什覺羅龍什等遣人

予書責右衛將官曰曩與爾等定盟彼此毫無疑貳

見六年

月孰意爾等陰懷詭譎云約遼東人之在寧遠錦州者

尋盟竟久待不至及三次遣使寧遠復拒不納

見六年十月

且襲我邊境殺我二十餘人爾等或以詐盟為得計予

縱可欺

上天亦可欺乎為民父母不以民之疾苦奏於朝廷惟恐上之罪已則所謂大臣者亦何利於國何益于民耶強弱之形衆所共知欲息干戈可速遣信使持爾主璽書來如執迷不悟爾國之禍何時已也復令宣

諭城中軍民曰自古下情上達天下罔不治下情上壅天下罔不亂前歲兵臨爾邊既盟之後秋毫無犯此番興師皆由爾官吏蒙蔽君上毀棄盟言致陷爾等于塗炭也是日駐營于宣府城西南五里外明日移駐城東南

八月癸酉駐軍大同城南

大軍駐宣府城東南之後二日乙未移營薄新城
丙申發礮攻之擊斃守備一正黃旗樹梯二人既
登梯忽折遂罷攻丁酉移師西行丙午圍應州城
丁未分兵攻小西城克其郭己酉明開平諸生張
文衡自大同來歸言在明為代王府參謀見明國
諸臣結黨貪財專意罔上生民窮困想望太平惟
皇上威名震於天下且招賢好士慈惠寬仁君人之大德

咸備今大兵四路並入人心願歸者大半宜備書
前後興師之本意布告四方以慰民望

太宗遂命直文館

尋授秘書院副理事官後為甘肅巡撫
順治五年甘州逆回迷喇印叛亂遇害

賜卹廕八月甲子大軍以礮攻應州城東南石家村堡毀

其堞

御前親軍滿珠什哩海桑鼐格噶達琿綽諾先登敵

以大刀木石抵拒綽諾力戰敗敵遂破其堡

賜滿珠什哩海桑綽諾皆人口八牛八驢四魯格噶達琿

皆人口六牛六驢三陣亡之希福固哩布皆人口
十一羸一牛十一驢四并緞布衣服丙寅大軍自
應州北行四十里駐營偵者言明陽和總督張宗
衡大同總兵曹文詔俱率衆至懷仁縣

太宗度其必乘夜往大同

諭前鋒將圖魯什武拜速往懷仁縣後山路設伏邀擊圖
魯什等二更至知宗衡文詔已於日暮過其地乃
以行遲不及設伏

金史卷之八十九 卷十九
命記其罪即令躡蹤大同戊辰圖魯什等擒明哨卒十人

獲馬四十餘

駕臨大同南山曹文詒騎兵結營于城東南門外

命圖魯什將左武拜將右額駙多爾濟烏魯特旗總帥明安之子將中

先以鄂齊爾桑即扎魯特部貝勒巴克之子率二十人挑曹文

詒兵出戰

太宗下馬坐黃蓋下待之遣陣獲高登湖偕一人齎書與

大同城衆官索察哈爾逋逃又與曹文詒

書曰朕聞將軍乃識時俊傑兩國情形想久洞悉在廷諸臣當乘朕切于議和力言于上措斯民于太平乃不念將士勞苦不察兵力強弱逼之進戰稍有不前輒行劾罷或至論死且閹官專權行賄者獎擢無賄者降革上下蒙蔽功罪不明此番我軍既入內地將軍日後能保無罪乎朕非相激之言料將軍早已慮之深矣是日擊敗曹文詔騎兵追至城壕而還獲馬百餘卒未

命縱陣獲曹天良

曹文詔部下千總

同馮國珍

自明哈里莊送副將鮑承先之子韜

來營者承先本應州人來降後明人執韜置應州
獄及我軍駐應州張宗衡曹文詔出韜于獄令持
代王之母請和書詣我營韜由山中小路過哈里
莊遇蒙古兵刼殺復甦莊民留養數日國珍同二
人送韜持書至
與承先相見齋與明代王
子史失其名之母

楊氏

報書曰朕曾遣使于各處議和爾皇帝黜戮大臣大臣畏
懼以致蒙蔽不能上達此番進兵內地以昭願和不
得和之故已將此意作書布告各處誠能主持和議
當速成之緩一日則民受一日之禍蚤一日則民受一

日之福和議果成我兵不終日而出境矣朕若不思太平專嗜殺戮又何以服諸蒙古而統衆兵朕之議和實出至誠如稍有越志獨不畏

上天子惟願彼此以至誠相待耳壬申科爾沁部巴達哩
洪果爾布達齊武克善等教漢部索諾木杜稜等
索曼部袞楚克巴圖魯等喀喇沁部古魯思布布
等察哈爾部圖巴濟農等及杜爾伯特扎賚特烏
喇特郭爾羅斯四子諸部長各籍所俘獲以

聞癸酉駐營大同城南山岡令各旗按兩翼環城而營遣擒獲僧人偕一人入城繼遣所俘明洪武八世孫朱乃廷入城越二日無回音又縱還乃廷之弟乃振與乃廷妻及三子俱入城初貝勒德格類等入獨石口克長安嶺城斬其守備攻赤城克其邪因城堅罷攻由保安州會師應州大貝勒代善等克得勝堡明參將李全自縊死盡殲其兵攻懷仁縣城未克明騎兵二百自朔州來援貝勒碩託偕諸

將擊敗之追至朔州城下收軍合攻井坪城亦不克奉

詔駐營朔州馬邑間分兵徇代州貝勒薩哈璘碩託至代州城西獲一人問之言西去七十里崞縣其城北垣牆頽壞薩哈璘遂往攻夜半拔之碩託攻圓平驛城中官民乘夜悉遁詰旦入城無所獲仍回原汎皆隨大貝勒代善至大同

御營宴之貝勒阿濟格多爾袞多鐸由巴顏珠爾格地入

龍門口明叅將以兵拒阻擊敗之尋攻龍門未下
奉

詔趨保安州克其城斬守備一携俘獲會師應州又同貝
勒豪格往略朔州至五臺山而還尋

命貝勒阿巴泰阿濟格額駙揚古利率兵往攻靈邱縣多
爾袞多鐸豪格率兵先往大同越四日阿巴泰等
攻拔靈邱縣斬知縣及守備又分兵二百攻王家
莊遇城中守備出戰殺之其子代守城亦殺之攻

城時正黃旗兵先登禮部承政巴篤禮督衆力攻
被創不退中矢陣亡

太宗聞之泣下曰此朕舊臣効力多年致命疆場深可惜

也
後贈授三等男世襲

閏八月庚寅旋師出尚方堡邊

先是八月丁丑

太宗自大同城南山岡移營四十里鋪前鋒將錫特庫納

海努山生擒明哨卒六人至五漢人一滿洲

命俱誅之明人為間諜書置於北樓口我兵獲之以獻其

書言滿洲原係我屬國當此炎天深入必有大禍

今四下聚兵令首尾不能相救我國人有得罪逃

去及陣中被擒欲來投歸者不拘漢人滿洲蒙古

一體恩養有漢人來歸者照黑雲龍例養之

黑雲龍初

為明總兵天聰三年十二月大軍擒之永
定門外五年九月隨征大凌河逃歸明

有滿洲

蒙古來歸者照桑阿爾齊例養之

桑阿爾齊不詳
由何部蒙古歸

明其為明副將見
天聰五年九月

若不來歸非死于吾之刀槍即

死于吾之礮下又不然亦被彼誣而殺之矣

太宗覽畢因復與明崇禎帝

書曰滿洲國皇帝致書于明國皇帝昨見皇帝書云滿洲
原係屬國此不惟皇帝言之即予亦未嘗以為非也祇
因遼東各官欺陵不堪屢次抒情往告又蔽之不通我
思此種情形仇怨已深難以剖白惟動兵戈可冀來詢
其由孰意皇帝乃惑于各官欺誑十數年竟無一言問
及以致戰爭不已若早遣一信使來詳詢事由判白是

非予豈樂尋兵戈耶爾國臣僚一味欺罔每當我兵入境自戮雞髮漢人虛報斬級千百我國若果傷折百千兵勢豈能常振耶以皇帝之聰明一忖度之而欺罔自見矣斬級之真假暨我願和之誠偽問黑雲龍自得其情但黑雲龍惟恐結怨于文武大臣是以不肯盡告于皇帝也時鑲紅旗邏卒又獲持書往陽和達張宗衡之曹文詔部下人書中詐稱滿洲兵被毆傷無數哭聲震天地又自誦陣斬甚多未暇取首級止取肱

一桿其言類此者甚多

太宗以原書付所獲人並

予書張宗衡曰昨到大同獲曹總兵遣人塘報軍情見滿紙皆是虛誑朕素謂明國大邦自有忠臣義士實心為國者何期一旦至此前次得宣府張總兵塘報其虛誑亦然由此以觀明國之衰已極矣朕入境幾兩月蹂躪禾稼攻克城池曾無一人出而對壘敢發一矢者今朕尚在爾地可令張曹二總兵集各路兵會戰爾等高坐

城樓以觀若爾出兵一萬朕止以千人應之出兵一千
朕止以百人應之如敢直前迎戰猶可自掩其罪不然
徒以虛言誑君亦可恥之甚矣爾皇帝不知以為既能
取勝速宜進戰爾等又畏懼逃遁縮頸城中如此則生
民之塗炭何日休息耶爾等皆代皇帝撫字億兆者自
宜乘朕願和凡有軍情據實申奏力贊和好乃欺君誤
國貽害生民寧不畏生受顯戮死遭冥禍哉朕欲決戰
之言非自矜誇因爾等虛誑已極故欲一較勝負耳爾

等若以朕言為是速約戰期朕當勒兵以俟已邗駐營
陽和前鋒將錫特庫遇天城哨卒斬四人及千總
一生擒一人至訊係滿洲誅之庚辰自陽和移營四
十里辛巳駐天城北錫特庫設伏赤城斬其哨探
千總一兵九人生擒四人獲馬十四前鋒將圖魯
什追懷遠哨卒斬四人又同侍衛拉都琥瑚沙瑚
什布及穆徹納洛實車克薩哈連設伏左衛城遇
祖大弼所隸騎兵二百五十人出城擊敗之斬三

十四人生擒把總一兵三獲馬三十八壬午大軍
至懷遠閏八月甲申朔駐營左衛城東乙酉圖魯
什往宣府偵探遇明哨卒十五人單騎衝擊之矢
中圖魯什腹仍力戰不休衆軍繼至斬十三人擒
二人前鋒將武拜錫特庫薩海至宣府設伏斬哨
卒二生擒守備一獲馬三

太宗間圖魯什創甚迎視之途

越二日卒于軍後追
謚忠宣世襲一等子丙戌

大軍渡左衛河北駐營丁亥攻萬全左衛城八旗

合力整挨牌進攻穴其城正紅旗樹梯親軍褚庫
布丹先登四面守兵皆潰斬其守備常汝忠殲其

城中兵千

賜褚庫馬羸各五牛一蟒緞一緞十九布一百五十紅氊

一尋授騎都尉世職後
擢任副都統謚襄壯布丹馬羸各四牛八緞十

五布百尋授雲騎尉世職後
擢任副都統謚毅勤庚寅前鋒將錫特庫

納海設伏宣府遇明哨卒三斬其一生擒二人

太宗班師出尚方堡邊二十里

命從臣敦多惠率四十人齎與留守瀋陽諸貝勒

敕曰前入邊時定議七月初八日四路並進朕率兩黃旗

及都元帥孔有德總兵官耿仲明尚可喜蒙古科爾沁

諸軍從尚方堡至宣府復由宣府新城東城西城趨應

州往視大同城其城南有兵結營擊敗之諸軍由龍門

口入者會朕于宣府由獨石口入者會朕于應州由得

勝堡口入者由大同直趨朔州又有沿邊過殺虎口繞

道至朔州者明大同城官吏欲盡殺降明之蒙古有蒙

古八百九十五名殺其守備一員來歸朕又至宣府西
六十里萬全左衛城攻拔之是行也我師戰則勝攻則
克風馳電擊所向披靡擊毀臺堡百二十擒斬甚衆遇
哨卒輒俘獲之軍威丕振明之邊將震恐未嘗敢整列
隊伍櫻我軍鋒惟兩黃旗攻深井城小西城正紅旗攻
懷仁縣兩白旗攻龍門城鑲藍旗攻沙城堡不克凡此
不克者非我兵盡力攻之而不克乃相機而止耳

九月壬申凱旋瀋陽

大軍自尚方堡邊旋師之後七日丙申以出師克
捷封牛八祭纛告

天九月戊辰留守貝勒濟爾哈朗等遣官齎奏至言國無
災祲境宇寧謐捉生五次屢有俘獲逃人兩次來
歸聞明崇禎帝遣官至錦州凡三調祖大壽未往
因繫其妻孥于獄復召之大壽乃行瀕行謂人云
我雖竭力為國其如不我信何我意此行與滿洲
國

皇帝可戰則戰量力不敵則與一言決絕而來若入京必致加害我觀時事若此是滿洲國

皇帝得天下之時遂率所轄蒙古沿途縱馬食田禾而去至寧遠駐三日復縱馬食禾餘皆以馬載之行又聞明崇禎帝以蒙古人雖附明實屬無用其在大凌河也殺人而食敗則先奔諭大壽殺之凡二次蒙古桑阿爾齋等擐甲三夜欲執大壽大壽謂桑阿爾齋曰我視爾等如兄弟爾等何得如此桑阿

爾齋曰聞諭旨欲盡殺蒙古故我等有此謀以自
救耳大壽遂與之盟臣等偵知如此伏思大壽不
應召既負罪必求容于其主或侵我外藩蒙古亦
未可知惟

皇上熟慮之近有自明錦州逃來之烏納海言彼處蒙古

情形管兵部貝勒岳託因遣蒙古一人匿書靴內

致錦州蒙古多爾濟哈坦

本多羅特部長天聰二
年二月我軍擊敗之遁

往錦
州

諾木齊

本教漢部塔布囊奔投錦
州後見崇德六年三月

等謹以書

詞一併齎呈

御覽

書曰聞爾多羅特部落人共稱爾等為豪傑夫豪傑

識時何故與旦夕將亡之明國同謀待斃乎明國之
君心志驕盈不念人民困苦其大臣貪黷貨賄肆
行訐詭又濫用閹人以致閹人復恐嚇在外武臣
索取財物人皆重足而立明國將亡顯然易見往
年我國出兵恐察哈爾襲我之後故不久旋師今
察哈爾汗才身遠奔喇嘛圖白特部具大族臣僚
已來歸我國我攻城畧地縱淹留邇年亦不返顧
明人與我文戰必令爾蒙古在前進則為我戮退
則被彼誅勢難自全今我兵進征大同若擒獲大同
王子以易爾各城蒙古或圍困燕京聲言盡索蒙
古明人在危急之際豈惜爾等乎彼時雖悔何及
今宜乘時起事如欲我兵接應我兵即往如爾等
招撫城堡來降當以城堡付爾等駐守即棄去城

堡率衆來歸亦必與我國貝勒大臣一體相待豈
不聞我國愛養歸順之漢人雖陣前俘獲均加恩
育大丈夫一心國事何事不成宜速
乘時舉事勿猶豫不決致貽後悔
辛未大軍渡

遼河駐營十方寺邊濟爾哈朗岳託等迎謁與凱
旋貝勒大臣並

賜宴壬申

躬詣

堂子行禮乃還宮

甲戌以新獲瓦爾喀人戶撥補不足旗分

先是七年十一月

命大臣吉思哈武巴海率官八員兵三百人征朝鮮接壤

之瓦爾喀部

諭之曰爾等勿專以俘獲為念致降順之人復叛逃而去
所俘婦女當擇謹厚人守護若有姦淫事覺從重治罪
至將領士卒身欲休息止許弛弓晝寢若昏夜務擐甲
上弦不可怠忽其八貝勒家人遇用兵處皆令入伍聽
調遣凡所俘獲令各自立營以無父母之子女分給守

視爾領兵諸將嚴飭軍士不許任意乘馬馬正行時勿
飲以水駐營時須散放滾塵先令食草然後飲以水其
寧古塔拉發二處人可分為三以二分留守一分隨征
烏扎拉部落編戶人等亦令隨征有所俘獲任其自取
八年五月甲辰吉斯哈武巴海還至寧古塔遣人
奏捷俘男子五百五十婦女幼稚一千五百獲馬
一百九十四牛一百八十三貂狐貉獺獐獾獐獾黃鼠
青鼠灰鼠等裘一百六十三領皮二千二百五十

張貉皮褥三緞四布一百二十人獲八十斤初八旗每旗分隸牛录二十五後漸增至三十至是

太宗諭貝勒大臣以吉思哈等俘獲之瓦爾喀人戶不必均隸八旗察明不足旗分撥補

冬十月壬辰索倫部

遼後裔

入貢

先是五月丙戌朔黑龍江濱索倫部頭目巴爾達齊率四十人來朝以貂皮一千八百一十八張入貢至是巴爾達齊又與景古齊哈拜孔恪泰烏都

漢訥赫徹特白哈爾塔等率三十五人來朝以貂

狐皮入貢是月庚戌

太宗率諸貝勒跪焚楮幣告

太祖之靈曰臣自受

命以來夙夜憂勤惟恐不能仰承

先志之重八年于茲矣幸蒙

天地鑒臣與管八旗子孫一德同心

眷顧默佑復伏

皇考積累之業威靈所至歸附甚衆朝鮮稱弟入貢喀爾喀五部舉國來歸喀喇沁土默特以及阿魯諸部落無不臣服察哈爾林丹汗兄弟其先歸附者半及林丹汗攜其餘衆避我西奔未至唐古特部殂于錫喇偉古爾部之大草灘地其執政大臣率所屬盡來歸附今為敵者惟有明國耳臣躬承

皇考素志踵而行之伏冀

神靈始終默佑式廓疆圉以成大業謹摠微忱曷勝感愴

上告

乙巳定蒙古牧地疆界

巴林與鑲藍旗蒙古以克哩葉哈達瑚濟爾阿達
克為界翁牛特與巴林以瑚喇琥護呼布哩都為
界奈曼與兩紅旗蒙古以巴噶阿爾和碩巴噶什
噶蘇特為界敖漢與正黃旗蒙古以扎噶蘇台囊
家台為界四子部與鑲黃旗蒙古以杜穆達都騰
格哩克沃朶爾台為界阿魯科爾沁與兩白旗以

塔喇布拉克遜島為界扎嚕特與正藍旗以諾綽
噶爾多布圖鄂魯穆為界既分之後有越界者坐
以侵犯之罪往來駐牧務彼此會齊同時移動不
許參差其分定地方戶口之數正黃旗二千戶鑲
黃旗六百戶正紅旗八百二十戶鑲紅旗八百三
十戶鑲藍旗六百七十戶正白旗六百四十戶鑲
白旗七百戶正藍旗七百戶教漢部一千八百戶
索曼部一千四百戶巴林部色特爾八百戶滿珠

什哩八百戶扎魯特部達爾漢巴圖魯圖巴二千
四百五十戶內齊圖巴濟農二千戶四子部圖們
達爾漢二千戶阿魯科爾沁部達賚達爾漢車根
塞梭二千戶翁牛特部杜梭濟農二千戶棟岱青
二千戶共計二萬三千餘戶時奉

命往碩翁科爾地會外藩蒙古部長分界之大臣阿什達
爾漢塔布囊達雅齊即于其地會議柰曼部長衮
楚克巴圖魯前此從征大同朔州及圍井坪城離

汎私駐應罰馬三千駝三百又因爭奪俘獲斫傷
喀喇沁部布延圖應離部衆喀喇沁部屬員達賚
務巴什等五人以其事訴請公斷違例私罰駝
馬完結應論死妻子入官翁牛特部屬員塔喇海
班第二人越所限地界私至哈爾占喀喇穆掄地
應罰馬千駝百

太宗覽奏

諭曰爾等所議良是但事屬外藩概從未減袞楚克巴圖

魯免離部衆可罰馬百駝十其離汎駐營亦罰馬百駝
十私議完結之五人皆免死達賚務巴什護衛納哈二
人各罰牲隻八十一塔布囊託固布雅什哩琿津巴克
什博第三人各罰牲隻二十七仍令同給被傷之布延
圖牲隻八十一塔喇海班第各罰馬百駝十所罰馬駝
可分給管蒙古旗大臣及審事蒙古諸貝勒

十一月乙丑考察各官

以六部各官三年考績分別陞職有差又考察管

漢軍各官以撫養之善否戶口之繁減分別優劣
是月使犬部蓋青屯頭目僧格率五十人來朝貢
貂皮

十二月辛丑宴察哈爾新附諸臣

先是六年四月

太宗統師征察哈爾過興安嶺至達勒鄂謨察哈爾舉國
驚恐無措林丹汗見人心惶擾知國勢不可為謀
竄遁遂渡黃河西奔其臣民素苦其暴虐抗違不

往中途逗遛者十之七八又牲牧死者甚多食盡
殺人以食自相攻奪潰散七年八月有鳥曰鷓鴣
羣集遼東遼東素無此鳥乃西北蒙古所產其色
淡黃形如鴿爪如人足而有毛國人皆曰蒙古之
鳥來至我國必蒙古有歸順之兆云八年正月

太宗聞察哈爾部衆流散于錫爾哈錫伯圖地

命大臣布哈塔布囊岱青塔布囊偉徵松愛巴思翰康哈
勒德勒格爾達巴海等率兩翼蒙古兵調巴林喀

喇沁阿魯阿巴噶諸部兵會于都爾弼地合征之
諭曰爾等宜悉心籌畫而行前設哨卒偵探若見火烟勿
令彼知覺乘夜前進出其不意以取之惟拒敵者殺降
則携歸撫養仍嚴密防守毋致竊馬而遁凡所俘獲與
衆軍士共之二月丙子巴思翰等至錫爾哈錫伯圖地
俘獲婦女幼丁二百一十七馬四十一而還

命即以所俘獲分賞出征將士有差五月庚寅林丹汗之

叔茂奇塔特

前此逃奔
科爾沁

來朝

賜甲冑雕鞍蟒服鞞帶帽靴銀盆等物丙申

諭詢貝勒大臣征明當由何路皆以山海關對

太宗曰非計也宜直抵宣府彼察哈爾前聞我兵徃征心
膽皆裂舉國騷然其貝勒大臣將偕來歸我我師由宣
府至大同必遇諸途可多備服物為賞賚收其部衆以
歸計莫善于此遂

命出內庫緞帛多製各色衣服帽靴甲冑橐鞬鞍轡等物
備用諸貝勒亦多製一切用物携之出征

命使招撫駐牧明邊境察哈爾遺衆

諭以書曰朕聞察哈爾西遷以來所遺部衆俱駐明邊外此大誤矣既已居彼何不歸我凡爾宰桑等不拘衆寡有來降者即命掌其國事成全錄用如不審度事勢欲於明境安居獨不思以全盛之察哈爾尚不能自存而逃往西海地方爾等又焉能久居於此乎明與我兩國之強弱爾試忖度之當自明也我國與爾等語言雖異衣冠則同與其依異類之明人何如來歸於我不惟爾

等心安即爾祖父世傳之衣冠體貌亦不煩變易矣且彼
先附明國之右翼圖們蒙古等窮年累月不得家居妻
子不能相見屢為我兵所戮其存者明人猶驅之使戰
委命疆場此皆爾等所目覩者若不從朕言亦任爾自
便但我大軍一出儻蒙

天佑以地與我彼時欲求撫養言之無及矣

天果佑我得明土地雖潛奔西海者亦難安居豈特爾區

區附明之蒙古哉庚戌

親統師自都爾弼地移營綢安林丹汗所屬圖巴濟農下
二人驅馬十三匹來歸六月乙卯朔駐營古勒班
圖爾哈地前鋒將努山錫特庫等擒一人來獻訊
之言自察哈爾國逃來千餘戶俱在中途遂

命大臣英固爾岱覺羅布爾吉率每旗官二員兵二千名
往探其所在布彥岱達蘭泰星訥率蒙古兵由哈
瑪爾嶺一路進布哈塔布囊岱青塔布囊率蒙古
兵由錫喇穆綸一路進癸亥英固爾岱等遇察哈

爾戶口一千來歸先遣人引其頭目扣肯巴圖魯
至布彥岱等遇一喇嘛同鄂爾齊圖推圖兩頭目
率戶口百弓手百有五十來歸亦遣人引其頭目
至並朝見

御營宴賚之

命貝勒德格類大臣武訥格往英固爾岱軍迎護新附戶
口會大軍于錫哩地布彥岱等至錫喇穆掄河源
復得男婦幼小四十人

命以新附千餘戶分隸八旗給米八十石送往

盛京

賜御前留用巴木布祜舒稜格巴達什噶爾瑪伊勒都齊
等各緞袍一乙亥大軍駐博碩堆地察哈爾額林
臣岱青多爾濟塔蘇爾海固寶布彥岱塞稜等五
宰桑率男子七百人携家屬二千人來歸丁丑察
哈爾圖巴濟農下諾顏太什伍巴什班第車臣台
吉白本塞稜墨爾根四人來奏圖巴濟農以林丹

汗暴虐國人聞

上寬仁恤衆德威廣被遂叛彼來歸

太宗遣貝勒阿濟格額駙揚古利等率兵迎之壬午圖巴

濟農携所屬千餘戶至

駕臨烏爾圖布拉克南山

御黃幄圖巴濟農獻珊瑚琥珀菩提子三種數珠金銀器

皿甲冑馬駝子塞稜台吉扎木蘇杜稜太什諾顏

婿安達古英蘇默爾台吉吹墨爾根道通巴圖魯

班第岱青固穆斯嘉布台吉瑚勒該齊台吉各獻
駝馬朝見圖巴濟農遙拜一次復近前行抱見禮
命坐左側大宴之

賜甲冑蟒袍帽靴鞵帶鞍馬及隨來台吉等服物有差初

喀爾喀貝勒巴哈達爾漢獲罪我國

見天命六年三月至

是亦輸款來歸七月庚寅師次哈流圖地察喀爾
雲敦車臣鄂伯類塞稜台吉塞稜墨爾根巴圖魯
叟僧岱青率四百餘戶來歸

御黃幄宴之前鋒將圖魯什等至歸化城遇察哈爾宰桑
阿雅克喀塔喜木哩克喇嘛古穆德塞臣袞楚克
僧格台吉特濟策祜伊特格爾圖噶爾瑪青善卓
哩克圖偉宰桑等率一千二百戶來歸先携為首
諸宰桑以行已酉朝于應州

御營閏八月庚寅駐營尚方堡邊外二十里察哈爾噶爾
瑪濟農等遣三十人至奏同多尼庫魯克德森濟
旺多爾濟達爾漢諾顏等率衆六千併家口來歸

又言林丹汗病痘殂于大草灘地距西海十日程
其子及餘衆不能守俱躡歸附人踪跡而來

賜使者扣肯巴圖魯揚古爾和碩齊克什克布揚古託克
塔哈札木蘇喇唐及袞濟使者阿泰和碩齊並其
同來四十人馬匹牛羊有差仍

命塔布囊達雅齊率四十人於是夜起行往迎噶爾瑪濟
農等壬辰

命大臣阿什達爾漢額爾德尼囊蘇哈爾松阿同八旗前

鋒將每旗各一率兵百名往偵林丹汗子額爾克
孔果爾踪跡乙未運米三百於克依綑地

賜後來歸附諸蒙古丙申額駙古爾布什

天命六年十一月由喀爾喀台

吉來

歸舊所屬之阿爾賽率六人及妻子自察哈爾

來歸丁酉察哈爾阿蘇特部男子十二名婦人三

口來歸己亥以察哈爾來歸各官分隸八旗贍養

辛丑

賜新隸正黃旗之阿雅克喀塔喜木哩克喇嘛宰桑古穆

德塞臣宰桑牛百羊千令其均給部下貧乏者其餘分隸七旗諸宰桑令管旗各貝勒給以牛羊壬寅

命大臣托克推率每旗官一員兵十名護察哈爾來歸之蒙古家口赴

盛京辛亥察哈爾四大宰桑德森濟旺噶爾瑪巴圖魯濟農多爾濟達爾漢諾顏多尼庫魯克率衆六千奉汗妃挈家口來歸

名宴于克依綑地

御營

命大貝勒代善及七旗貝勒更番宴之九月甲戌以新附
察哈爾戶口撥補不足旗分壬午大臣阿什達爾
漢等携來自察哈爾之喀爾喀貝勒齋賽下岱噶
爾塔布囊塞稜台吉至奏言黃河西奇塔特徹爾
貝賽稜布都瑪爾兩宰桑率千人渡河而來又有
衆宰桑率四千人待冰結時渡河來歸

命額爾德尼囊蘇哈爾松阿迎之十一月戊辰還報渡黃
河三日遇塞稜車臣宰桑沙布古英宰桑阿裕什
台吉巴特瑪台吉等率四百戶來歸攜之渡河至
錫喇穆綽地又有俟冰結後渡河者巴賴都爾莽
奈宰桑摩羅爾額爾德尼宰桑溫多額爾德尼宰
桑等共計五千戶二萬口十二月甲午

命前鋒將領勞薩蘇爾德蘇達喇布延努山鄂碩準塔藍
拜八員率兵一百往迎

諭曰聞察哈爾宰桑奇塔特徹爾貝塞稜布都瑪爾塞稜
車臣等將至恐明人聞之截其來路故先遣愛松古率
喀喇沁兵百人候於彰武臺河口可順道遣人邀之同
行爾等未會之先當從朕旋師舊路而往會後可沿明
邊界護之而來若已至石魯蘇特地可擇草茂處令其
駐牧爾等酌量近明地駐劄於除夕歸來可也丁酉墨
爾根喇嘛載護法嘛哈噶喇佛像至

盛京

元世祖時有帕克斯巴喇嘛用千金鑄護法嘛
哈噶喇像奉祀于五臺山後請移于蒙古薩斯

嘉地又有薩爾巴胡圖克圖喇嘛復移于察哈爾
祀之至是墨爾根喇嘛見

太宗威德遐敷臣服諸國旌旗西指察哈爾不戰自遁知
天運已歸我

國于是載佛

像來歸

辛丑

召新附諸臣大宴之德森濟旺阿雅克喀塔喜木哩克喇
嘛率諸臣跪獻酒

諭曰朕本不飲酒念爾新附諸臣誠意當飲盡一卮復酌
酒

親授諸臣飲舊大臣亦徧及備陳樂舞諸臣靡不歡忭越

二日奇塔特徹爾貝塞稜布都瑪爾塞稜車臣等
各率部衆至復以閏八月後來歸各官及壯丁三
千二百十一人均隸各旗

賜阿雅克喀塔喜木哩克喇嘛德森濟旺等一百二十七
人貂鑲朝衣貂裘猞猁裘貂帽涼帽靴蟒緞素
緞橐鞬弓矢銀器甲冑韁帶鞍轡牛羊馬匹奴僕
屯莊其所屬塔哈爾噶爾瑪等一百九十一人各
賜朝衣等物有差又

賜竒塔特台吉屯莊四所每所人十名牛六頭

皇清開國方略卷十九

欽定四庫全書

皇清開國方略卷二十

太宗文皇帝

天聰九年乙亥
正月至九月

天聰九年春正月癸酉

命功臣管各牛录

免功臣拜音圖等徭役並令專管各牛录其因戰
功勤職增給壯丁及力戰陣亡增給其子壯丁俱
令專管

丁丑正宗室名分

太宗命管禮部貝勒薩哈璘宣

諭曰宗室懿親不加表異等威莫辨甚或與常人相詆詈及祖父非所以尊國體也至稱謂之間尤當使親疎有別嗣今

太祖世子俱稱阿哥

六祖子孫俱稱覺羅皆就其原名稱為某阿哥某覺羅

六祖子孫俱繫紅帶如常人與繫紅帶者相詆詈及祖

父者死其不繫紅帶而致人辱詈者勿罪是月使大部

索瑣科來朝

二月壬午朔

詔各官舉賢才

諭曰朕惟圖治以人才為本人臣以進賢為要天下才全
德備之人實不易得爾滿漢蒙古各官果有深知灼見
公忠任事者當速行薦舉所舉之人不分新舊歸附已
仕未仕但得居心公正足備任使者即呈送吏部其居

心公正通曉文義者呈送禮部該部員勒隨時奏聞候

朕量材錄用

文館寧完我范文程先後奏言

上求賢若渴恐得真才以輔國家恐諸臣各昵親知黨援
律違貽誤不小請仿照古人連坐法明降

諭旨酌

定功罪以示勸懲則宵小退而真才進矣

同日又

諭曰邇者察哈爾新附各官頻加恩宴其燕京及大凌河
歸順各官久未宴勞雖得新附之員其舊歸我國者詎
可頓忘耶

召歸順各官自守備以上皆集

賜宴於殿庭時預宴各官有形容憔悴者

太宗見之曰或者貝勒等不加恩養以致如此我國家蒙
天眷佑所得大小官員人等朕皆一體加恩未嘗分別新
舊爾貝勒等務體察朕意毋使先歸者反致失所貝勒
等奏曰誠如

聖諭嗣後臣等加意恩養自不敢忘

丁丑編審喀喇沁壯丁

編內外喀喇沁蒙古壯丁共一萬六千九百五十

三名為十一旗古魯思希布杜稜等五千二百十

六名為一旗以古魯思希布

喀喇沁部長
見天聰七年

領之鄂

木布楚琥爾等一千八百二十六名為一旗以鄂

木布楚琥爾

土默特部長格根汗孫天聰三年隨喀喇沁部長蘇布地來歸

領之

賡格爾等二千一十名為一旗以賡格爾

土默特塔布囊

崇德元年封

善巴

土默特塔布囊天聰三年來歸與古魯思希布同為元臣濟拉

稱之後崇德元年

同領之正黃旗津扎多爾濟等壯

年封建爾漢

丁及在內舊喀喇沁壯丁共一千三百五十六名

合舊蒙古為一旗以阿岱領之鑲黃旗烏斯庫拜
琿岱等壯丁及在內舊喀喇沁壯丁共一千四十
五名合舊蒙古為一旗以達賴領之正紅旗昂阿
幹濟泰等壯丁及在內舊喀喇沁壯丁共八百名
合舊蒙古為一旗以恩格圖領之鑲紅旗蘇木爾
賴瑚爾等壯丁及在內舊喀喇沁壯丁共一千十
六名合舊蒙古為一旗以額駙布延岱領之正白
旗布爾哈圖等壯丁及在內舊喀喇沁壯丁共八

百九十名合舊蒙古為一旗以伊拜領之鑲白旗
拉木布哩等壯丁及在內舊喀喇沁壯丁共九百
八十名合舊蒙古為一旗以額駙蘇納領之正藍
旗錫喇奇塔特等壯丁及在內舊喀喇沁壯丁共
八百六十名合舊蒙古為一旗以武賴領之鑲藍
旗諾穆齊錫賴圖等壯丁及在內舊喀喇沁壯丁
共九百十三名合舊蒙古為一旗以瑚什布領之
八旗總管大臣下設梅勒章京甲喇章京各二員

凡年六十以下十八以上并從本地方帶來漢人
均照例編審其目不能視足不能行手不能持者
不入數內如諸貝勒以下有隱匿不送或經旁人
舉首者原告聽離主將所隱之人入官仍交刑部
照例治罪其十家之長罰馬二著為令

三月戊辰禁濫役妨農

三月甲子

太宗出獵於三岔堡丁卯還宮翌日集諸臣

諭曰朕昨出見民間耕種愆期蓋因章京等有事城工欲
先時告竣故額外派夫致悞耕作築城固為正務然田
地荒蕪民食何賴嗣後有濫役民夫致妨農務者該管
章京以下俱治罪

五月乙卯征黑龍江呼爾哈師還

先是八年十二月壬辰

太宗命大臣巴奇蘭薩木什喀分左右翼率官四十一員
兵二千五百名往征黑龍江地方

諭之曰爾等此行道路遙遠務奮力直前毋怠毋忽至俘獲之人須善言撫慰飲食甘苦一體共之則人心歸附必衆且此地人民語言與我國同攜之而來可以爲我用攻略時宜諭之曰爾之先世本皆我一國之人載籍具在爾尚未之知是以甘於自外我

皇上久欲收服時有未暇耳如此諭之有不翻然來歸者乎爾等其勉體朕意

諭畢

賜食又

諭曰入略之後或奏捷或送俘必由錫伯綽爾門

科爾沁所屬地

地方經過將來遣使往還及運送軍糧亦必於此處相

待其應略地方須問鄉導人有夏姓烏音屯長喀拜及

從役二人庫魯木圖屯長都爾敦及從役二人

本月喀拜都爾

敦等率從者六十
九人來朝貢貂皮

又納屯一人適已偕至今俱令從軍

爾等率之往經行道路詢彼自知若彼處已經略定此
歸附三屯不可稍有侵擾宜令留於本處並諭以因爾

等輸誠來歸故使復還故土嗣後宜益加恭順倘往來稍間必譴責立至矣若所略不獲如願則不必留此三屯當盡攜來凡器用之屬有資軍實者無使遺棄軍還務使結隊而行不可分散又

召屯長喀拜都爾敦等及其從人進宮

賜食既出

命沙爾琥達穆成格傳諭喀拜等令其引我軍前行凡各屯寨善為指示復

命貝勒薩哈璘杜度大臣納穆泰額駙達爾漢兵部承政
伊遜徹爾格並叅政等官送於二里外按旗分列
簡士卒閱器械宣讀

勅諭給諸將各一道遂令起行九年三月丁巳

特遣甲喇章京瑚什布率每旗二人往迎之四月癸巳巴奇
蘭薩木什喀令兵部啟心郎額色赫伊木布奏報
收服呼爾哈編戶壯丁二千四百八十有三人口
七千三百有二馬八百五十有六牛五百四十有

三駝八辛丑

詔貝勒阿巴泰率衆官迎凱旋將士於蒲河之岡大宴之
至是巴奇蘭以所招降頭目人等至

太宗御殿凱旋諸臣率衆朝見

太宗以諸臣出師勤勞

命主將巴奇蘭薩木什喀二臣行抱見禮巴奇蘭薩木什
喀出班叩頭抱

上膝見次招降二千人叩見次索倫部長巴爾達齊等

四月

壬寅黑龍江索倫部長巴爾達叩見
齊率二十二人來朝貢貂狍皮

命招降軍士俱較射設大宴

召巴奇蘭薩木什喀以金卮酌酒

親賜之次飲各旗出征署旗務大臣次飲以下諸臣并招

降頭目宴畢

上回宮陞巴奇蘭薩木什喀等世職加世襲二次隨征之

吉思哈等三十六員各陞世職一級翌日巴奇蘭

等籍俘獲人口一百十六名馬二十有四牛十有

七貂狐貉獐獐水獺等皮共三千一百五十皮裘
十五領以

聞

太宗念將士勞苦即分賜右翼五旗主帥巴奇蘭左翼五
旗主帥薩木什喀其章京以下各賞賚有差招降
之七千三百人俱

賜房屋田地衣食器皿等物

已已纂譯宋遼金元史

太宗召文館諸臣諭之曰朕觀漢文史書殊多飾詞雖全覽無益也今於宋遼金元四史內擇其勤於求治而國祚昌隆或所行悖道而統緒廢墜與夫命將行師之方及賢奸忠佞之有關政要者彙纂繙譯成書用備觀覽通鑑之外野史所載語多不經無知之人轉相流傳信以為實著禁止繙譯又見漢人稱其君者無論有道無道概曰天子不知皇天無親惟德是輔必有德者乃克副天子之稱今朕祇承

天佑為國之主豈敢遂以為天之子為天所親愛乎倘不行善道不體天心則天命靡常寧足恃耶朕惟朝乾夕惕以仰答

天眷而已

丙子出征察哈爾諸貝勒奏捷

先是二月丁未

太宗命貝勒多爾袞岳託薩哈璘豪格為統兵元帥管旗大臣納穆泰為右翼吏部承政圖爾格為左翼率

護軍騎兵一萬往收察哈爾林丹汗子額爾克孔
果爾額哲

親授方略遣之四月辛巳遣大臣濟什哈海塞率八旗官
八員及外藩蒙古八十人往駐上都城舊址候諸
貝勒消息至是貝勒多爾袞等遣禮部啟心郎祁
克格等賫疏奏言臣等奉

命率大軍至錫喇珠爾格地方遇察哈爾索諾木台吉率
部下一千五百戶來降已遣溫泰等引之見

上矣臣等率兵前進至黃河造船於四月二十日渡河二
十八日抵察哈爾汗子額爾克孔果爾額哲所駐
托里圖地方天霧昏黑額哲國中無備臣等恐其
驚覺按兵不動遣葉赫貝勒錦台什之孫南楚及
其同族阿什達爾漢并哈木松阿岱袞同往令先
見其姊蘇泰福晉

蘇泰福晉係葉赫貝勒錦台
什子台吉德爾赫爾所生及

子額哲告以諸貝勒奉

命統大軍來招爾等秋毫無犯南楚等馳至蘇泰福晉宮

呼人出語之曰爾福晉親弟南楚至矣福晉聞之
令其從者舊葉赫人覘之還報蘇泰福晉慟哭而
出與其弟南楚相見遂令其子額哲率衆宰桑出
迎我軍臣等列旗纛鳴畫角以進率額哲拜

天畢與額哲母子相見臣等恐額哲及其羣臣生疑乃與
誓告

天地翌日額哲設宴相待臣等亦設宴答之各贈雕鞍裘
馬等物於是額哲部下羣臣額濟格固實等率其

部民一千戶歸降當我軍未至時有鄂爾多斯部
濟農來招額哲令遵其約束與之盟誓詰旦已行
前軍阿什達爾漢等聞而追及之臣等察其有異
志羈留之謂濟農等曰凡察哈爾有人民在爾部
者當悉送來不然我兵即前進矣又謂察哈爾諸
臣曰凡爾部人民有遺留鄂爾多斯者可具數報
來衆以數開報隨遣人賫往鄂爾多斯部於是察
哈爾額爾克楚琥爾妻及其部下達雲倬爾濟等

官並部民千餘戶及一切諸物俱送至臣等荷蒙

天眷仰仗

皇威謹遵

指授方略進止以時故得全部收服謹具疏以

聞方捷音將至之前一日

太宗諭文館諸臣曰朕憶從來左耳鳴必聞佳音今左耳
鳴出師諸貝勒必有捷音至矣是日祁充格等果至時

適

賜巴林部長色特爾

元太祖裔天聰二年來歸

宴其右翼宰桑布克山

津捧觴跪進曰

主上聖明

皇天默佑臣等獲預宴筵得聞喜音敢進一觴虔申慶賀

太宗曰朕承

天眷佑喜慶肇臻正宜仰體

天心益求治理倘朕政治有違闕爾等當直言極諫忠良

之言朕未有不聽何至相侑以酒導朕於非義耶布克

山津慚謝而退

六月乙酉征明寧錦軍還

先是五月癸亥

太宗與諸貝勒大臣議曰出征察哈爾諸貝勒此時想已

入明境明國必調寧遠錦州兵往山西救援今當

駐軍寧錦地界遙立軍營使彼望見我軍戒嚴守

禦以牽制其救援之兵議定遂於每牛录內選護

軍二人

命貝勒多鐸為帥以艾度禮尼堪額必倫瑪瞻博洛穆爾
祜等阿哥輔之與管旗大臣達爾漢葉克舒宗室
莽古阿山石廷柱兵部承政徹爾格前鋒將領武
拜護軍將領圖賴同往復令喀喇沁部賡格爾萬
丹塞稜等赴明北邊索舊犒賚并圖貿易若得犒
賚則取其所予允貿易則與之互市使明人疑懼
緩西援兵多鐸等既奉

命遣阿山石廷柱圖賴武拜等諸大臣率兵四百先趨錦

州大軍隨後過十三站立營明偵卒見我軍至馳
報錦州總兵祖大壽大壽急令副將劉應選穆祿
吳三桂叅將張國忠王命世支明顯及遊擊八員
率兵二千七百名迎探親率馬步兵出錦州城五
里駐營時松山城守副將劉成功趙國志率兵八
百人與錦州副將劉應選等合兵至大凌河西遇
阿山石廷柱等相對列陣未及戰阿山等馳報多
鐸多鐸率兵迎赴明兵見我軍如川流林立自山

而下塵埃蔽天不辨多寡遂驚潰阿山石廷柱圖
賴武拜等突入掩殺陣斬副將劉應選殲其兵五
百人生擒遊擊曹得功及守備三員獲馬二百一
十匹甲冑無算收軍還距錦州松山城五里駐營
次日復攻一臺克之壬申遣固納禪旺奇奏捷癸
酉

命沙爾琥達扎福尼薩弼圖爾哈格巴庫董世祿穆瑚
公衮等每旗大臣一員率每牛录下護軍一人往

濟師并縱陣獲遊擊曹得功還癸未喀喇沁部賡
格爾萬丹塞稜等赴明國貿易至遼河遇明卒三
十人自冷口來哨探殺二十人生擒一人來獻問
之言明兵五百人自遵化來為我邊外蒙古擊敗
止餘七人遁去至是多鐸等凱旋

太宗率大貝勒代善及貝勒阿巴泰德格類阿濟格出
盛京懷遠門迎於五里外

御黃幄貝勒多鐸遵

上命進前跪行抱見禮

上亦答禮出征諸大臣以次拜見遂以陣獲官三員並籍
所獲軍資馬匹戶口牲畜以

聞

太宗以多鐸初專閫外能出奇制勝嘉獎之

賜良馬五匹甲五副以所俘獲賞從征將士有差

丁酉征東海瓦爾喀軍還

先是八年十二月癸卯遣大臣武巴海荆古爾岱

率每旗將領一員每牛录甲兵一名共四百人往
征瓦爾喀

太宗命管兵部貝勒岳託傳

諭曰茲命爾等往征瓦爾喀所至務謹慎從事各副委任

不可怠忽聞尼滿地方有千餘人在彼築城屯駐爾等

宜往略之至各屯戶多少武巴海盡知

武巴海於五年七年俱征瓦爾

喀有功

可取者量力取之有分達哩所居之屯宜率鄉導

往前先取餘可次第略定凡此諸屯非有統帥哨防不

過泄泄然散處各村落然其人雖愚耳目頗衆爾等自
寧古塔啟行之日即行防範毋令彼知覺伺其所在以
智取之所有俘獲當加意守視時其衣食勿令凍餒前
遣達珠瑚以疎忽遇害

天聰元年征瓦爾喀為俘卒所害

念其効力年

久著有勞績方令承襲世職爾等未能如達珠瑚之功
倘不自慎欲希格外之恩不可得也夫攻略之後或俘
人遁逃或自被戕害皆由與彼同處日久漫無防範以
及戮辱其婦女所致前者正紅旗輝滿征瓦爾喀時所

為多不義爾等慎勿效尤亦毋以其物力豐足妄行多
取彼既服從秋毫不可犯爾等其毋違朕命九年四月
武巴海荆古爾岱等自寧古塔遣噶爾珠奏報收
撫瓦爾喀壯丁五百六十人婦女五百口幼穉九
十口又俘獲婦女六十口馬六十牛百貂獐獐獐
等皮六百六十有奇裘三十八領六月丙戌遣塞
紐克沙努喀克徹尼郎格穆爾泰佟阿圖昂金等
章京八員率每牛录兵一名往迎所降戶口至是

武巴海荆古爾岱等攜所招降瓦爾喀部人至

命禮部諸臣出迎大宴之

賜屯長分達哩蟒緞朝服并緞褂其餘諸人依次分給房
屋衣服諸物仍以所獲

賜將士有差叙功陞武巴海荆古爾岱等世職並加世襲
二次

辛丑勛諸貝勒愛養人民

太宗諭諸貝勒大臣曰

皇考所遺人民能愛養之使漸富庶此即為臣子者之孝思也先時八家貝勒恪守朝廷法度今貝勒等凡有工作不遵朕制額外役民試思民不得所逃亡離叛戶口減少是違

皇考之志有虧孝道且無異於助敵長寇也茲者荷承天庥朝鮮賓服蒙古向化朕常念新舊歸附之人皆宜恩養故時以為訓夫善養人者無論大小賢愚隨材器使俱有裨益譬如刈伐則用斧斤宰割則用鉞刃濟用於

臨時必須預養於平日爾大臣等職司匡救諸貝勒知小民之疾苦而不能告及見驕縱之人不能切責之其何以為大臣也且朕招徠遠人勤求治道於新舊人等憫恤不忘時加宴賚非不憚勞也不過為國與民耳若疆圉大定民生安樂則昇平之福貝勒大臣實共享之否則雖拓土開疆亦何以安輯之哉

癸卯申禁放鷹擾民

太宗諭諸貝勒大臣曰昔

太祖時曾禁諸貝勒子姪不許郊外放鷹深恐蹂踐田禾傷殘生畜以致擾害貧民故也今聞違背禁令仍復擾民此風漸不可長朕凡行師出獵雖嚴寒之時皆駐蹕郊外不入屯堡亦慮耗損民物耳嗣後放鷹之人若剝削小民擅取牲畜事發之後決不輕貸語云涓涓不塞將為江河熒熒不救炎炎奈何蓋以凡事當杜漸防微縱弛之後則難整頓若禁之不早後悔無及也

丁未宴察哈爾先後來歸衆官

奇塔特徹爾貝等來歸後

見八年十二月

有俟黃河水結

後至之巴賴都爾宰桑瑚賽巴特瑪扎薩古爾阿
山宰桑巴吉爾扎薩古爾綽克圖雅當扎薩古爾
塞梭塔布囊齋薩木宰桑沙濟德勒格爾齋薩額
什克庫魯克等十二頭目於三月庚午率一千四
百有四人攜妻子牲畜來歸越二日

召巴賴都爾等入

殿庭

賜宴

太宗酌納其所獻黃金駝馬等物

賜賚有差六月壬寅溫泰等引來降之索諾木台吉等共

率部下一千三百九十五人家口五千四百三十

八人至獻馬匹朝見設宴宴之至是復

賜察哈爾先後來歸各官宴

太宗以金卮酌酒各

親賜一觴

命德參濟旺再飲對曰酒醇甚恐不克勝

太宗曰姑飲無妨德參濟旺曰

上實未嘗何以知之

太宗曰朕從無誇語豈但此酒可飲朕能知之即察哈爾部之傾覆爾諸臣之來歸朕皆預知亦豈待嘗而後知耶德參濟旺曰

聖諭及此洵有如神之鑑也

秋七月癸酉禁諸臣徇私枉斷

先是二月癸卯總兵官尚可喜奏言

上恩養新人每事概從寬典小民無知漸生驕縱與其懲治於犯罪之後不如嚴禁於未犯之先如某罪應以某法處之其重者或請

旨或徑送刑部輕者或令臣便宜處分乞一一頒示命遵照舊例行至是

太宗諭曰朕於滿洲蒙古漢人不分新舊視之如一凡有鬪毆之事既經控告宜聽法司秉公審斷近聞漢人與

滿洲蒙古鬪毆各相袒庇是不遵國法而妄行也犯者
必重懲之是月分別管理漢人官員以各堡生聚增減
黜陟之陞李思忠楊于渭佟三吳裕李國瀚等世
職罰高鴻中張士彥金玉和李時馨張大猷祝世
廕吳守進等銀各百兩高拱極蒲時雍楊國興俱
革職為民斥金海塞為奴
時楊于渭名下管屯千
總李士英亦以類數加
增糧牛录章京後為鍾邱亮首告所增人數乃邱
亮任內事士英冒功法司鞠實革士英職鞭一百
九月癸丑貝勒多爾袞等收服察哈爾部衆獲厯代

傳國璽遂略山西而還

貝勒多爾袞等奏捷之後六日

太宗命布哈塔布囊哈克薩克鄂謨克圖率兵齎

勅往迎

諭出征諸貝勒曰朕蒙

上帝神明俯垂眷佑國內臣民共享寧謐之福四境田禾
雨暘時若秋成可望巴奇蘭武巴海等先後招降呼爾
哈瓦爾喀兩處編戶壯丁甚多俘獲人口牲畜稱是又

遣人赴錦州捉生獲其人訊之聞爾等自大同宣府進兵明國檄調山海關外兵馬往援因復命貝勒多鐸等從廣寧入牽制援兵恐我兵乘勝深入派每

旗率護軍往濟其師又蘭磐岫巖

四月甲辰駐防蘭磐岫巖大臣喀爾

喀瑪錫翰等沿海巡哨獲漁船二隻漢人二十一名殺一人生擒二十人來獻發尚陽堡居住

海州二月

壬辰駐防海州大臣伊勒慎赴上游哨探獲船二十隻擊斬五十三人生擒十七人五月乙丑明國有八人自錦州乘船入海至遼河界捕魚伊勒慎等駕小舟追獲之殺三人生擒五人發靜安堡安插

各有擒

獲又兩次所獲朝鮮國人皆遺書國王令彼來取

三月朝鮮

通政大夫李翔遣人入我境內捕魚為守將正古特所執殺四人生擒三人五月朝鮮官二員從役三十二人往明國貿易因舟壞登岸行蓋州守將扎努追獲之並獲舟中貨物又八家共遣二百

人往朝鮮貿易已得其貨物還

五月遣往朝鮮互市之戶部承政瑪福塔等奏

言臣等率八家商人至王京及義州將所領銀兩半買緞紬半買布疋還

又黑龍江貢貂者

塞布奇屯十六人噶勒達蘇屯四人郭博爾屯二人額

蘇哩屯二十四人阿里岱屯八人克音屯四人烏魯蘇

屯二人此皆舊往還之人又新至者海倫屯二人裕爾

根屯固濃屯昆都倫屯烏蘭屯各一人又索倫部內先

至者四人其因馬疲留於科爾沁地方者兩起共六十
七人皆革心向化不似先時執拗矣至是貝勒多爾袞
等遣官奏謝

上遣使遠迎恩並奏報收獲歷代傳國玉璽重藏於元朝
大內至順帝棄都城攜之入沙漠後崩於應昌府
璽遂遺失越二百餘年有牧羊於山岡下者見一
山羊三日不啣草但以蹄跑地牧者發之璽乃見
歸於元後裔博碩克圖汗後為察哈爾林丹汗所

破璽歸林丹汗林丹汗亦元裔也貝勒等聞璽在
蘇泰福晉所索之既得視其文乃漢篆制誥之寶
四字璫璽為質交龍為紐光氣煥爛洵至寶也多
爾袞等喜甚曰

皇上洪福非常

天錫至寶此一統萬年之瑞也遂收其璽攜降民渡黃河
至歸化城時貝勒岳託有疾分兵一千駐營歸化
諸貝勒率衆兵並察哈爾汗子額爾克孔果爾額

哲及其大臣往略明山西一帶自平魯衛入時鑲
白旗護軍將領博爾輝率二十人遇明右衛兵二
百人敗之生擒一人以所得牲畜米糧送至岳託
所大軍由朔州前發明寧武關叅將率兵五十名
來探為鑲藍旗前鋒將領錫特庫所敗殺十餘人
明參將中傷領餘兵遁走我軍直抵長城下貝勒
等遣前鋒將領勞薩乘夜往毀長城遇明羊房口
步兵出迎擊敗之次日又敗寧武關哨卒斬十人

生擒二人遂毀關入略代州大軍於忻州駐劄於是諸貝勒縱兵環略忻州一帶又令右翼主將正黃旗喀爾喀瑪防禦忻州敵兵千餘從忻州出戰我哨卒擊敗之比我軍將還前鋒將蘇爾德安達禮率四十人伏於忻口遇明往來哨卒三百人斬殺過半獲馬六十匹大軍至忻口明總督遣副將一員領兵七百從代州來探左翼主將圖爾格率侍衛等自忻口追擊至崞縣獲馬六十餘匹我軍

至黑峰口勞薩擊斬明遊擊下哨卒四十名獲馬三十餘匹我軍出長城自應州赴平魯衛衛內有馬步兵五百餘出城列陣右翼主將納穆泰左翼主將圖爾格率兵破其陣追擊至城濠明兵死者百餘人貝勒等率大軍出邊令納穆泰圖爾格率官十六員兵一千名殿後有明大同總兵王姓屬下兵及寧遠總兵祖大壽援兵共馬步卒三千人齎出圖爾格先見之遂奮勇衝入明兵皆潰圖爾

格乘勝掩殺擁至壕邊我軍皆步戰擊死明兵甚衆明潰兵五百餘人復於臺上列營納穆泰率兵圍臺盡殲其衆其馬匹死傷無算我軍獲馬二百匹是役也我軍入明邊馳略自平魯衛入朔州直抵長城又經寧武關代州忻州崞縣黑峰口應州而復還平魯衛共擊斬明兵六千餘人俘獲人口牲畜七萬六千三百有奇乃出邊與貝勒岳託會於歸化城旋師丁亥

命每旗官二員護軍各十名每牛录騎兵一名各以馬三匹載米一石往迎出征貝勒及諸將士

太宗曰出征諸貝勒久勞於外兼得察哈爾全部人民及玉璽而還不可不遠迎乙巳率大貝勒代善及貝勒阿巴泰德格類濟爾哈朗多鐸並諸大臣出撫近門謁

堂子拜

天西行出上榆林邊凱旋諸貝勒遣官四員馳奏言大軍

於八月二十九日至扎哈地方納赫特河九月初
五以前當過渾河擬於陽什穆河躬謁

聖駕丁未

上渡遼河率諸貝勒大臣遍閱所築巨流河城址是晚

駐蹕陽什穆河岸九月辛亥遣剛林羅碩同章京八員赴

貝勒軍約相見期壬子貝勒多爾袞等營於

御營之右二里許翌日卯刻

太宗出御營迎諸貝勒諸貝勒率歸降察哈爾汗子額爾

克孔果爾額括及其大臣等馳馬來謁

太宗率衆稍前至

御營南岡所築壇上設黃案焚香

太宗率衆拜

天畢還

御座凱旋諸貝勒設案襲以氊奉所得玉璽置於上令正黃旗大臣納穆泰鑲黃旗大臣圖爾格舉案前進諸貝勒率衆遙跪以獻

御幄前設黃案焚香

太宗受玉璽親捧之率衆復拜

天禮畢復位傳

諭左右曰此玉璽乃歷代帝王所用之寶

天以畀朕非偶然也於是貝勒多爾袞進前跪拜復近

上前行抱見禮貝勒岳託薩哈璘以次如前行禮畢額哲

率其國諸大臣遙跪稍前拜一次復近前跪拜行

抱見禮

太宗大宴凱旋諸貝勒及額哲與其羣臣宴畢

閱所獻金印玉帶諸色數珠蟒緞金銀器皿駝馬等物酌
納之以凱旋諸貝勒所獻駝馬仍分

賜八貝勒及行間効力大臣有差收鄂爾多斯濟農送至

察哈爾人戶選壯丁八百名補足缺額各旗

命額爾克孔果爾額哲居遜島錫爾哈地屢

賜雕鞍馬匹貂裘靴帽等物頒行

太宗率大貝勒代善等出

盛京五里外大宴遣之

皇清開國方略卷二十